

Аллоҳ таолонинг мадади



15:00 / 01.01.2022 2381

Иброҳим алайҳиссалом Аллоҳ таолонинг амри билан аёллари Ҳожар онамиз ва фарзандлари Исмоил алайҳиссаломни озгина егулик ва сув билан ҳеч қандай гиёҳ ўсмайдиган, сувсиз саҳрода қолдириб кетадилар.

Аллоҳ таоло Қуръони Каримда Иброҳим алайҳиссаломнинг тилларидан ҳикоя қилиб, шундай марҳамат қилган:

«Роббимиз, ҳақиқатда, мен зурриётимни Байтул Ҳароминг ёнига, гиёҳсиз водийга жойлаштирдим. Роббимиз, намозни тўқис адо этишлари учун. Бас, Ўзинг одамлардан баъзиларининг қалбларини уларга талпинадиган қилгин ва уларни мевалардан ризқлантиргин. Шояд, шукр қилсалар» (Иброҳим сураси, 37-оят).

Ҳожар онамиз эмизикли ўғиллари Исмоил алайҳиссалом билан ўзларидаги таом ва сувни истеъмол қилиб бўлишади. Кейин Ҳожар онамиз ўша ердаги Сафо ва Марва тепаликлари орасида бориб келар, у тепаликка етиб бориб, устига чиқиб, Аллоҳ таолога дуо қилиб, сув сўрар, кейин ундан тушиб, бунисига келиб, тепасига чиқиб, Аллоҳ таолога дуо қилиб, сув сўраб, пастга тушардилар. Мана шу тарзда Сафо-Марва орасида етти марта бориб келдилар.

Аллоҳ таоло онамизнинг ана шу ҳаракатларига мукофот ўлароқ замзамни ато этди. Бу замзам ўша пайтдан то бугунги кунимизгача истеъмол қилиниб келинаётган муборак сувдир.

Аллоҳ таолонинг ёрдами, мадади келса шунақа бўлади!

Юқоридаги расмда Ҳожар онамиз етти марта бориб келган икки тепалик орасининг бугунги кундаги кўриниши акс этган. Ҳаж ва Умра қилувчилар ушбу жойда етти марта бориб-келиб, саъй қиладилар. Биринчи юриш Сафо тепалигидан бошланиб, еттинчи юриш Марва тепалигида тугайди.

Нозимжон Ҳошимжон тайёрлади